

Lajčák: Nagraditi BiH u skladu sa napretkom u reformama



Evropska unija mora ostati konzistentna u svom pristupu prema zemljama Zapadnog Balkana i nagraditi ih u skladu sa konkretnim napretkom u reformskim procesima, poručio je danas visoki predstavnik i specijalni predstavnik EU Miroslav Lajčák ministrima vanjskih poslova Evropske unije, koji su se sastali na Brdu kod Kranja u Sloveniji.

Na poziv slovenskog predsjedništva Evropske unije, Lajčák je informirao šefove diplomatije EU o političkoj situaciji u Bosni i Hercegovini i učestvovao u raspravi ministara o jačanju mira i stabilnosti na Zapadnom Balkanu.

„Moramo biti pragmatični i fokusirati se na ono što je ostvarivo u određenom momentu. Istovremeno, jasno moramo reći političkim liderima u BiH šta se od njih očekuje u svakoj fazi procesa evropskih integracija. Uvjeti se moraju ispuniti i oni prvenstveno trebaju imati motivirajući snagu“, naglasio je Lajčák.

Proces evropskih integracija predstavlja strateški izazov za Bosnu i Hercegovinu. Politički lideri i parlamentarci će imati priliku da pokažu kako se nose s tim izazovom 2. aprila, kad Parlament BiH bude odlučivao o zakonima za reformu policije. „Usvajanja tih zakona bi omogućilo potpisivanja Sporazuma o stabilizaciji i pridruživanju i konačno otvorilo put BiH prema

Evropskoj uniji", rekao je Lajčak.

Visoki predstavnik i specijalni predstavnik EU takođe je podsjetio ministre da će teško doći do istinskog pomirenja u BiH dok su najtraženiji optuženici za ratne zločine i genocid, prvenstveno Karadžić i Mladić, i dalje na slobodi. „Nemoguće je govoriti o pomirenju bez pravde.”

Bosna i Hercegovina mora i u budućnosti ostati u centru pažnje Evropske unije, i zbog same činjenice što će EU nakon tranzicije OHR-a u ojačano predstavništvo EU preuzeti ključnu ulogu u pružanju podrške reformskim procesima u BiH, zaključio je Lajčák u svom obraćanju evropskim šefovima diplomatije.